

平
播
全
書

平播全書卷十

明長垣李化龍

牌票

行令各道徑自料理軍中事務

爲緊急軍務事照得征播師期業已計定軍中一切事務
既不可缺又不可遲若件件請詳然後乃行往返耽延坐
致違誤相應暫破拘攣用從權變爲此牌仰該道官吏照
牌事理今後除機密重情法應計議者仍聽通詳外其餘
一應小事應用忙迫如委用文武調撥兵馬轉運糧餉計
處運夫起發軍火器具火藥馬匹匠作人夫等項但係軍

中緊急事件一面徑自酌行一面具由呈報不必呈請致
滋往返耽延誤事統俟兵務完日仍照舊規施行通毋故
違未便

行四兵道督催運夫

爲軍務事近據各委官報稱各處運夫多有一人包攬數
名及將領到米糶賣空身前來直至交米州縣方行買納
米貴或無米多束手無策輒至逃避等因看得運夫一節
屢行正官經理申嚴再四今乃不行清查委之無力棍徒
假稱省祭義官名色貓鼠同眠致滋奸弊今進勦期迫若
前途營中乏餉有誤軍機卽將經承各員役寸斬亦無益

於事應合嚴責爲此牌仰該道官吏卽行各州縣凡派有
運夫者各掌印官責有風力佐貳首領管押前來如佐領
不堪掌印官卽將印務交與教官親自督押前來領運刻
期交納以後若仍有包攬逃走等弊致誤軍機者先將掌
印官拏問其餘以下員役定行以軍法重處決不輕貸該
道立刻催行毋違

行川東道鎮申飭綦江軍情

爲緊急軍務事本月初六日卯時據總兵官劉綎呈據標
下領兵防禦綦江都司周敦吉等報稱楊酋親統苗兵二
萬由大路松坎安穩楊珠領苗一萬有餘由小溪里穆炤

地方只在初七日來犯綦江等情到職看得所報雖未委
虛實在我分布宜周除整擄兵馬分割險要如果入犯分
投截殺及行防禦江津將領隄防楊珠穆炤等賊嚴加哨
備遇警聽令夾攻務獲萬全等因到部看得逆賊頃者出
犯龍泉因被我兵破其金竹官壩巖園等寨遂爾撤回內
顧連日略無動靜已甚疑之蓋狡賊探知湖貴各路兵勢
稍緩特欲併力綦江或明由正路誘敵或暗從間道攻襲
拌死一逞以挫我鋒此先發之術昭然甚明所據防禦誘
餌之計當在此一舉以奪其魄爲此牌仰該道官吏卽刻
傳諭綦南江津各路將領等官多方哨探加意隄防整擄

兵馬籌定計策或挑戰以誘其來或設伏以斷其後機會可乘則併力一擊時當有待則少俟並舉事緩指麾將領截殺事急該鎮奮勇前驅務使逆賊不致得志而我銳氣自此鷹揚有不戰戰必勝矣

行道鎮禁兵爭行連坐之法

爲軍務事照得各營官兵奉命剿賊聚首一處便是一家遇有些小爭競當聽同夥老成曉事者叶和勸解卽宜冰消霧釋有何難受便至羣毆不顧身命大功在前各將好漢氣力殺賊有名有利到家父母妻子望見歡喜今爲小忿私鬪喪身豈不失望又無美名此本部院深於各兵有

所不取者合行戒諭爲此牌仰該鎮道官吏卽便轉行各路領兵將領等官一體出示曉諭各營官兵知悉今後但有二人相毆不論是非各細打一百聚至十人以上者摘將起禍兩人亦不論曲直並斬以徇若事起散兵仍罪坐甲長事起甲長罪坐隊長事起隊長罪坐哨長事起哨長罪坐千總事起千總罪坐將領定行連坐各按軍法從事斷不輕貸

行劉總兵截殺

爲緊急軍務事本月初八日卯時據總兵劉綎報稱本職於初六日抵綦江隨據哨役王時報稱播酋出犯東溪等

處本日申時又據監軍道差役口報撞見播酋有步兵千餘馬兵五六百已出俱披紅絮被各執長槍等情抵晚又見號火傳至有警看得楊酋自出之情雖未委真的然賊出情形已真除於初七日發兵前去東溪迎敵并劄老營相機進剿外理合塘報又據川東監軍道稟報相同各等因到部案照初六日據報酋兵必於初七日出犯綦江當卽脾行分兵截殺去後今據前因看得此賊曾有傳言但探得該鎮在於何處必要決一勝負據此是知該鎮已劄綦江故首出此地欲挫該鎮銳氣實未可知但今各路俱將進兵彼酋親出則前有勍敵後有警報正其奪氣之時

一戰擒之未可知也今毋論出與不出然賊兵旣已大至
自宜整兵迎敵爲此牌仰該鎮卽刻督令部下大小將領
相機戰守賊如果來若銳氣甚熾則堅壁以待疲困然後
分兵擊之設若初來未整卽指麾羣師併力勦殺驅逐入
巢不必牽延時日致滋狂逞此該鎮初出綦江第一功也
慎之慎之

行四兵道催兵糧

爲軍務事照得勦播興師已在目下師行糧從理所必然
乃近日訪得糧尙未運至邊城夫尙未催至邊地至於委
用分管糧運各官往往恣行推諉如陸雲松已到而稱病

如段文郁中途而復返遠者遷延不來近者改委不定臨
事避難習以爲常轉相效尤牢不可破異日誤事卽以重
法處之彼避事之人亦自甘心於國事何利焉合行申飭
督催爲此牌仰該道官吏卽便馬上差人嚴催各委官務
要齊到原派地方再催各經管官將原派夫役亦齊到原
坐地方伺候進兵隨運米糧在各州縣者速運至近播城
邑以便轉運該道仍與監軍道及總兵官大小將領不時
計算或營中道路延長夫數量應增募或進兵路分多歧
官夫亦應分隨或軍士應自行帶糧或運夫應各帶兵器
一切事宜原行未備者徑自酌處妥當要在濟事本部院

不從中制如以成議已定略不關心延緩稽遲以致誤事
卽該道安得辭其責乎以後但有某處官到某處夫到不
時揭報以憑稽查處治有委官推託希圖改委者另自叅
呈重究

曉諭進兵

爲軍務事照得本部院於二月十二日起馬親統天下兵
馬五十萬分十八路並進前往播州擒拏逆賊楊應龍凡
該州地方漢土官民九種十三姓楊保人等投降者全家
免死拒敵者九族皆誅擒斬應龍父子來獻者照格陞賞
的不食言

查動銀兩招撫投降苗寨

爲軍務事照得興隆等處九股夷苗近日羅拜投降實出
真誠據委官指揮曹仁佐稟稱招過四十餘寨本官自備
銀五十五兩買備花紅牛酒之類賞過各苗卽今見在招
撫所據合用銀兩應合動給爲此牌仰新鎮道官吏卽查
各願撫處寨苗是何寨分如果出自真誠該道卽於都勻
鎮遠等府縣庫堪動銀兩酌量動支若干打造銀牌買備
花紅牛酒另委一官同指揮曹仁佐前去各苗寨撫處事
完將動過銀數委過職官撫過苗寨冊報查考此係綏柔
遠人至緊首務毋得遲違未便仍呈該省撫院知會

行劉帥防賊衝突

爲軍務事據贊理綦江監紀官同知史朝貞稟稱審據生擒苗羅受吐稱楊應龍命母柱穆炤周俸祖等六提調共統兵九千人先來劄營東溪又於松坎地方修截路二條探聽大兵出日親來綦江迎敵拌命直衝重慶等因到部看得此路既有盛兵又有該鎮親臨調度逆賊卽生兩翼亦莫能越胡爲尙敢狂悖拒命長驅興言及此令人切齒爲此牌仰該鎮卽將綦江一路關隘險阻箐林之處前後左右暗伏奇兵數枝安置硬弩火器分布停當賊如不動則挑戰以激其鬪設或來衝則奮力以折其鋒必須前後

掩至左右夾攻奮勇血戰一鼓成擒所謂眾人逐兔在茲一舉該鎮其決策圖之倘或不行備禦不行侈力萬一長驅直衝而莫能堵或從歧路夜入而襲其後不但該鎮前後受敵恐府城爲之震驚矣此在該鎮慎之毋忽

行安疆臣一意進兵

爲緊急軍情事十六日據塘報千戶潘之玉報稱二月初八日有貴州朱宣慰母大哭進城赴院道報說有子承恩在洪邊劄營被楊酋發兵擄去隨從兵士千餘盡被殺擄又據武舉周英單騎飛報初六日酋兵來戰一陣散去初七日五鼓不知苗兵何時已渡洪邊河來圍營周英覺早

卽時上馬逃回視承恩被捉是實省中嚴謹城門士民甚
是驚惶等因到部看得宣慰朱承恩素非逆賊敵手而使
之孤軍劄於比鄰之地此亦設備者之疏於計也本官身
膺重責旣不度量又不隄防致賊夜渡圍困若履無人之
境破寨被擒實出自取何足爲異但承恩原係逆賊之壻
就中佯輸詐敗希圖取事實未可知矧安疆臣與朱承恩
雖有同僚之誼據其時事恐亦難與爲之援者卽今大兵
已進立等獻俘若持姑息之心更懷觀望之計不知承恩
與朝廷孰輕孰重萬一不察顛倒不辨是非牽制怠緩致
誤軍機恐非臣子之義亦非身家之福爲此牌仰本官照

牌事理卽便查照原行欽遵明旨一心任事親自統率兵馬火速自抵播州務將黨惡盡斬元兇就擒一以見該司官日報國之忠一以表不負本部院與貴州責成至意如或藉口同僚有礙加兵狐疑不進觀望不前縱賊長奸致誤軍機者卽係通同詭套誰肯信之是蹈播州之漸也愼之愼之

再催各路進兵

爲軍務事照得大兵併臨賊必窮蹙乃今數日以來杳無動靜似懷畏縮之心尙有觀望之計沮銷士氣甚屬不振合就查催爲此票仰該道官吏卽查該路官兵旣已依期

併進正揮戈躍馬之日爭旗奪鼓之秋緣何軍中絕無消息連日未見捷報不知是何情形牽延時日一面嚴督上緊擣巢一面定計先擒元惡星火飛報以慰拳拳如或再行延緩觀望不前及輕率寡謀爲賊所誘致誤軍機者有賜劔在慎之慎之

申定衝鋒賞賚

爲軍務事照得賞格內開苗級一顆賞銀五兩今加倍賞銀十兩已經懸示外爲照近日克破金竹關壩等寨所獲功次此係未進大兵之前勦零功照級賞賚斬級之人今大兵旣進之後與賊對壘之時當以衝鋒破敵爲第一

等功不分有無功級首當優賞得級者次之庶人心奮勵
苦樂適均合就通行申明爲此牌仰該道鎮卽便轉行各該
領兵將領等官一體遵照今後每營先定衝鋒人數凡遇
上陣大敵衝鋒之人果能奮勇當先破陣致挫賊鋒者擒
斬功級或係有名首惡或係脅從餘黨直俟收兵解驗明
白聽委官照格給賞領回聽本營領兵官通計功賞若干
分別定數衝鋒者重賞斬級者量賞以示殿最如衝鋒雖
定而臨陣之時未曾破敵皆由對敵散兵自獲功級者則
全賞斬級之人衝鋒不與不許妄冒混爭及徇情不均如
違各以軍法從事決不輕貸

獎總兵劉綎首捷并催兩省進兵

爲軍務事本月十八日卯時據提調綦江總兵官劉綎報稱十二日出師東溪進隨報楊酋添兵七千助提調楊兆麟率穆炤鹿罕等拒敵王師就經分布標下官兵進剿十四日本職到李漢壩前哨望見賊眾是日天晚彼此剗營十五日黎明與賊大戰從卯至未我兵連贏數陣攻打二洞當陣擒斬寨長頭目并賊級及俘獲婦女牲畜頗多各賊奔回柑木洞見在圍困我廂攻取必期盡滅以便長驅等因到部查自大兵並進之後數日以來通無動靜又經三次督催去後今據前因看得八路齊進獨該鎮首破賊

鋒功稱第一孰有讓焉自此賊膽已落諸寨震驚破竹之
勢已成埽穴之功可必但柎木洞雖已逼圍尙未克破誠
恐人心易驕賊詐難測既慎困獸復鬪再防賊兵出援法
貴速圖用收成績爲此牌仰該道官吏卽便督率官兵將
柎木洞一面奮勇速攻以收全捷一面多方設伏以斷救
援埽此羣醜長驅而進畫定方略早殄渠魁雪軍民向隅
之悲紓朝廷西顧之慮此該鎮竭臣子之忠亦亦本部院
之所最望者慎之慎之

一行

五監軍
五總兵

自此賊膽已落諸寨震驚所據各路官兵亟
宜乘此瓦解之勢共收埽蕩之功合行督催爲此牌仰該

道
鎮官吏卽便切責將領官兵務要彼此修力早夜圖謀直
搗賊巢盡殲羣醜雪軍民向隅之泣紓朝廷西顧之憂如
或再行怠緩牽延不進本部院以奉行之遲速爲功罪之
斷案尙方嚴重恐難追悔慎之慎之

禁軍兵不許執指運夫

爲軍務事照得運夫之役專爲轉餉以供官兵肩擔臂負
登山越嶺艱苦備極者乃運至營中轉回中途而遇進營
軍兵中有不遵紀律擁眾恃強將人夫截路拘執或搜取
隨帶盤纏或勒令挑負行李以致未進之夫或畏懼逃回
或借此中止致誤軍機深可痛恨除已往外合行嚴禁爲

此牌仰領兵將領等官今後分發軍士進營務要嚴諭恪守紀律如有仍前用強執拏運夫搜去盤纏及勒令挑負行李以致違誤軍餉者許領兵官卽將違犯軍兵登時斬首以殉如領兵官徇情不舉者本部院爪探員役報至定將本官按以軍法從事決不輕貸

督勵運餉官夫

總督軍門示

一掌印官不親自押夫運餉者罷職不敘

一押運員役包夫者斬

一運夫脫逃者斬

一運夫違限一日以上細打一百三日以上者斬

一運夫違限三日以上脫逃三人以上押運員役細打一百違限五日以上脫逃十人以上皆斬

一軍兵搜奪同夫盤纏及勒令背負衣械者斬

催總兵劉綎進兵

爲軍務事頃據該鎮報稱兵至李漢壩與賊楊兆麟穆炤鹿罕等對敵連破二洞擒斬多功餘賊奔回柵木洞見在洞前岡困以俟我廂攻取必期盡滅以便長驅據此則楊兆麟等皆釜中之魚也乃今四日之上未見克破第恐賊兵出救不無牽制法在速圖不宜久待爲此牌仰該鎮卽

刻督率將領三軍多方分布一面大張必剿之威一面開布投降之路籌定方略相機撫剿一應機宜悉聽便宜從事若此賊不滅糧運難通糧運不通長驅難計老師費財非完策也慎之慎之

催督安疆臣進兵

爲軍務事照得貴州宣慰司兵旣甲於諸司界更邇於各路誠能矢心殲寇何異摧枯拉朽今四川綦南兩路已成破竹之勢酉石二司更多克洞之功乃宣慰安疆臣胡爲半月之上按兵不動似有首鼠之計明懷蚌鷸之私除暴安民摠忠報國恐不應如是合就差人守催爲此牌仰本

官卽便督率目把陳恩柯阿哥等統領勁卒直擣播州馘斬元兇蕩平羣醜庶幾上答朝廷委任之誠下盡臣子修職之分不然付託不效心事不明卽百口無以自解也愼之愼之

申諭兵將

爲軍務事照得播賊楊應龍大逆不道興師征勦將皆東南西北之豪傑兵多邊腹土漢之貔貅遠者萬里而來近者千里而至一時聚首曠世奇逢以此堂堂之師赳赳之士麾旌所指不日就擒真足以雪眾憤而伸國威各路將官共襄厥功矣但恐八路入關之後會合播州之間將權

不一軍令多弛萬一爭功爭財自相起釁甚非所以肅天
討而安職分也及照本部院奉命專征職在安民如將官
恪遵職業樹有勞績者固與之敘功若故違軍令自作不
典者亦與之定罪然俟其有過而罪之不若禁使勿犯之
爲愈合行嚴諭爲此牌仰該道官吏卽便轉諭各營諸將
各司土官一體知悉方今入境分道進關之前目下抵播
首惡就擒之後毋爭功起釁爭財相戕毋懷私而乘機報
復毋恃強而縱肆欺凌俱靜聽本部院秉公敘錄共沾爵
賞如或故違不遵盡削功勞仍重加叅究決不輕貸

行五分守動倉穀碾米

爲緊急軍務事照得征播官兵俱已進營節報攻破險洞
擒斬俘獲漸有次第惟軍前糧餉雖經儲積頗厚要在有
備無患斯爲得策今查通省府州縣預備等倉稻穀數年
以來未經動賑卽有賑貸去處又經買補填實相應酌量
動支碾米以濟急用爲此牌仰該道官吏卽行後開府州
縣將見在稻穀無論預備常平社倉俱卽動支三分之二
星夜碾成熟米係濱江等處一面先行起解不濱江者相
距不滿一二日之程一面陸運水路地方以次轉運仍各
照後開坐定去處聽解軍前支用其應委職官與陸路合
用人夫水路合用船隻俱要先期備辦伺候以便臨歧發

行仍令各衙門文到之日先將見在穀數及應碾米數先行飛報查考毋得遲違未便

獎賞克洞官兵

爲獎賞首破險洞官兵以鼓敵愾事連據監軍并巡道報稱總兵劉綎躬率兵將克破柎木險洞擒斬多功等因塘報到部爲照柎木洞係穆炤等賊黨所據夙稱險惡從來奢效忠楊應龍所屢圖之而不能一造其域者乃本官獎率三軍奮不顧身一鼓而攻破之大振我軍之威立破逆賊之膽功居第一捷報無雙所據本官之決勝萬全及將士之鼓舞用命均有可嘉相應獎賞以鼓勇進爲此牌仰

該道官吏卽將發來共重二兩銀花一樹紅段一匹綠段一匹又動支懸賞銀五百兩內將二十兩折充銀盃盤同花段送交該鎮除銀四百八十兩聽憑該鎮分散部下官兵各收領有死傷者仍厚爲優恤以示本部院旌異首克險洞懸賞之意具支送過緣由報查

催各路進兵

爲軍務事照得八路官兵會合進剿今已十日之上昨據總兵劉綎報破柵木等洞又經本部院動支犒賞外其餘杳無一聞爲照各路戰將雄兵無慮數十萬乃今有以沿途小伐塞責者有全無一功具報者悠悠曠日老師費財

殊非長策合行申嚴督催爲此牌仰該道官吏即便嚴催
部下將領官兵務要同心僉力奮勇爭先剋期會合擒惡
擣巢萬全取勝以慰眾望毋得逗遛觀望曠日持久自貽
伊戚亦毋妄聽誘引輕率寡謀墮失機宜懍懍軍令具在
本部院毫不寬假也慎之慎之

查通省庫銀解充軍餉行守巡道

爲軍務事照得征播官兵分路並進節報剋破夷洞擒斬
頗多第七省官兵日費糧餉不可勝計目今司儲已支大
半而師期難以逆料錢糧宜當預處檢查通省府州縣在
貯銀兩堪充軍餉者數雖無多亦可濟用擬合通行清查

爲此牌仰該道官吏卽便轉行道屬府州縣速將貯庫實在銀兩除正項留備聽支外其餘各項錢糧不拘多寡盡數查出開造清冊一面通詳一面起解重慶府收貯聽充軍餉之用施行軍情重大立等待支毋得違錯未便仍移文布政司知會

行湖北道運糧

爲軍務事本月二十六日據塘報報稱十八日生員李佩兵一千見在偏橋候監軍道過堂領糧督餉道尙未到衛陳總兵所統之兵已進者缺糧飢餓呼天叫地無可奈何其餘未進者向監軍道告討竟無措處等情到部爲照該

省官兵四萬一年糧餉節行轉解偏橋收貯聽支催督之
文何止百次乃該省當事各官半年之上所幹何事無糧
不住兵自古重之今官兵已進者既乏接支之粟而未進
者又無起發之糧坐令枵腹甯不寒心該道職專督運責
任匪輕其坐視誤事之咎眞不知所終者爲此牌仰該道
官吏限文到卽刻星馳至偏橋駐劄督理糧運將已進者
火速發去放散接濟未進者登時支給起發入營仍多方
催儼厚加儲積轉運營中以備關支如或仍前泄泄致有
脫巾之虞失誤軍機者本部院只知有敕令在慎之慎之

再催綦南進兵

爲軍務事照得兵難遙度事忌中制然未有不入虎穴而
能得虎子者該路官兵安營既定養銳已久似應相機進
取不宜老師費財合行催督爲此牌仰該道鎮即便督率將
領從長計議畫定方略如事勢未便則持重以待時機會
可乘則速發以趨利其未動也要使敵不能測其既動也
要使敵不能拒一戰收功萬全制勝此本部院所拭目而
望者也慎之慎之

催永甯合江進兵

爲軍務事照得

永甯合江

一路兵踰

六萬

開刀之令將近二旬

將領諸司絕無一功走報又無情形來稟豈該路與賊相

持而攻戰機宜大與各路不同耶師旅重事世然至此似此將領按法卽當重處但念用兵之際姑記嚴催爲此牌仰該鎮官吏卽便會同參將吳文傑等務期同心協力決策運籌督勵三軍奮勇血戰設法破隘相機擄集早奏奇功共懋爵賞如再觀望逗遛及輕率寡謀墮賊所誘致誤軍機者尙方具在決不敢私愼之

催進兵

爲軍務事照得三省合兵八路討逆約於本月十二日一同入關十八日各抵播州及將軍誓軍令俱經通行遵照去後爲照播本最爾之地賊係烏合之徒茲以八路齊下

勢如泰山壓卵逆賊縱有翼虎之雄豈能飛身救應矧把關者不過依附鼠輩當此大敵自當潰敗卽今已成破竹之勢當收犁庭之功法在直前不宜殿後合就督勵爲此牌仰該道鎮官吏卽刻切責領兵將領等官如關隘旣克不必停留一面選差鄉導多方哨探一面督率精兵相機進剿倘遇大枝勁敵務要併力血戰左右夾攻直擣虎狼之巢盡掃犬羊之眾早奏奇功共懋上賞毋得觀望不前致誤軍機未便

催湖貴進兵

爲軍務事照得征剿播酋師期久過川省各路已經深入

敵境日與接戰連報斬馘之功乃湖貴二省寂無聲息近聞各總兵將領監軍等官或高坐會城或結營近地擁兵自保寸步不移明欲令逆賊盡銳以攻川兵坐觀成敗存心如此何以濟事本應按法重處用肅軍威合再催督爲此牌仰該道官吏文到卽刻嚴督三軍戮力攻戰務須斬關而入殲厥渠魁懋賞之典自不相吝如再逗遛觀望坐失事機定先拏中軍後拏將領監軍兵糧等道一體從重叅究決不輕貸

布散賞格

爲軍務事照得本部院刊發旨意賞格諭言書冊條款等

件分發監軍總兵將領等官總計多者數幾五六百少亦不下二三百在前或謂相隔寫遠礙於傳遞目今官兵已入播境此項資格諭言若不及時遍發置之高架不但徒爲無益而關內夷民何能得知是自閉其門而養寇爲敵也爲此牌仰該

道鎮

限文到即便轉行將領等官監紀官各將本部院節奉分發旨意資格諭言等件火速盡數取至軍前或於對壘之時擲丟過陣或用俘獲之人放歸齎去但可以得通傳遞之法悉聽施爲俾之彼此觀看傳說倘能悔悟來降者加意察其真誠卽准歸順不許加害庶連結之黨可以潛消狂狡之賊可以孤立矣慎之完日具散

給過緣由數目報查

催南川進兵

爲軍務事照得該路前哨官兵已劄喬溪後隊軍士料以
漸進其邑梅之兵若已齊到卽當合哨同心斬關而入且
逆賊父子目下併力綦江關內必然空虛自應乘機取事
不宜曠日持久使賊反增堅守非上策也爲此票仰該道
官吏文到卽會監軍道馬總兵并軍前文武等官共議桑木關或
用攻克或行暗襲嚴督三軍戮力同心上緊攻取長驅直
入殲厥渠魁懋賞之典自不相吝毋再觀望坐失事機未
便

催永甯進兵

爲軍務事照得該路前哨官兵已劄二郎壩其後隊軍士
若已到齊卽當乘銳斬關而入且逆賊父子目下併力綦
江關內必然空虛自應乘機取事不宜曠日持久使賊反
增堅守非上策也爲此稟仰吳總兵川南監軍道官吏文到卽會
監軍道井軍前文武等官共議嚴門關或用攻克或行
曹副總兵暗襲嚴督三軍修力同心上緊攻取長驅直入殲厥渠魁
懋賞之典自不相吝毋得觀望坐失事機未便

查合永二路兵情

爲軍務事照得合江永甯二路官兵進營已久捷報無聞

連日塘報或云劄土城或云劄二郎壩或稱軍士缺糧採
蕨而食或云逆賊劄兵一十七營於澗壩及至差人偵探

盡是空營種種情形皆莫可測擬合嚴查爲此牌仰

吳川南

總兵

監軍道卽查該路官兵見劄何處糧餉曾否到齊軍士有

無接濟逆酋所劄營兵是否有無或是張疑以惑我兵或
係設伏以誘我進逐一哨探的確盡定方略可戰卽戰應
守則守務期計出萬全功收一舉毋得曠日持久老師費
財致誤軍機未便先具細查過前項情形緣由飛報查考

再催湖貴進兵

爲軍務事據擒獲奸細供稱逆賊所憚者劉總兵水西兵

除此二路餘皆不足挂齒意要結好水西攻擊劉帥本部
院未以爲然乃昨初一日逆子楊朝棟果自領兵三萬直
出綦江幸劉帥大挫其鋒斬首數百今報逆賊父子尙以
重兵屯駐石虎關意圖死拒則前報昭然不虛竊以各路
官兵持久不進或者心懷疑畏是誠有之至於水西地近
兵強又知逆賊父子全師而出若肯乘虛擣巢勢若摧枯
拉朽乃亦按兵不動是首鼠兩端坐觀成敗又昭然見也
如此尙可倚耶除另行查處外所有各路兵將合就督勵
爲此牌仰該道鎮官吏限文到查照節行并今牌內事理乘
此逆賊父子兵出綦江獎率三軍奮力血戰直入擣巢擒

渠魁懋爵賞在茲一舉毋得仍前退縮不進致誤事機定照前牌施行決不輕貸其安氏之兵不必督責看他作何收拾復命也

催偏橋龍泉興隆進兵

爲軍務事頃據塘報該路官兵方抵白泥龍泉毋論曠日持久逗遛不進只開刀以來逆賊探知二省四路按兵不動初一日令逆子領兵三萬直衝綦江幸劉總兵大挫其鋒擒斬數百今報逆賊父子尙以重兵屯劄石虎關意在死拒則關內必然空虛自宜乘機進取一可以坐收大捷一可以分綦江之勢不知該路何憚而不爲也豈以尙方

之劔可嘗試耶合再督勵爲此牌仰該鎮道文到卽便查照
節行并今牌內事理督勵將領獎率三軍長驅前進克關
破隘擒惡擣巢功收萬全在茲一舉如或仍前逗遛不前
致誤軍機定照前牌施行決不輕貸

告示發總兵劉綎

總督軍門示

一播州苗兵有能擒斬楊朝棟來獻者賞銀一千兩官授
指揮使

一播州苗兵有能擒斬楊惟棟來獻者賞銀一千兩官授
正千戶

一播州苗兵有能擒斬楊明楊珠來獻者賞銀五百兩官授副千戶

一播州苗兵有能擒斬田飛鵬鹿罕穆炤楊真母柱周五巴楊兆麟何樣等來獻者賞銀三百兩官授試百戶

一播州苗兵有能把住婁山關不容楊朝棟等走入者事成之日賞銀授官與擒斬同

一我兵有能擒斬以上各頭目者賞銀授官亦如之

一各頭目有能自斬親信用事之人親來歸降者賞銀授官亦如之

催安疆臣進兵

爲軍務事照得水西宣慰安疆臣奉命征勦播賊身膺重
寄責任匪輕本部院屢經加獎不次切責已不啻再三再
四矣乃今進兵二旬之外川省各路連日接戰擒斬多功
破洞克關兵逼內地長驅擣巢計在眉睫而該司擁兵數
萬杳無一功不知平日誇能之說希望之請將何指也明
有首鼠兩端之情坐觀成敗之迹昭昭在人耳目矣其貴
神速無取拙遲合再督勵爲此牌仰本官文到卽自度力
量如能建功報國除暴安民則卽日督率目兵奮勇先登
共殄渠魁仍取具一力平播進兵甘結同報本部院以表
眞誠倘不能幹此大功止欲因人成事亦要明白直說毋

得怯懦支吾致誤軍機未便

催永甯路進兵

爲軍務事據永甯監紀官蔡知府稟據土官袁初探得楊
酋統兵三萬出澗壩拒二郎壩官兵楊朝棟領兵不知多
少出貓兒岡拒松坎官兵等情報到據此看得逆賊因憚
劉帥威名故爾遣子朝棟出犯綦江雖被劉帥殺敗卽今
尙在此中劄營未退又知湖貴俱在觀望不進以致略無
內顧之心整兵親出似非虛語勿問大衝綦江澗壩而聲
東擊西勢必一逞所據合永二路官兵旣已整擱齊備法
應乘機進取不宜曠日持久爲此牌仰該

道鎮文到卽督令

部下將兵多方設伏賊果來則併力迎敵賊未動則相機破關巖門一克諸道並進長驅擣巢馘斬渠魁盡掃惡逆該鎮仍親率將士隨後接應務要計出萬全功收一舉早奏奇勳共受上賞此本部院之所跂足而望斷不肯少負血戰之勞者諒之諒之

勸務農業禁兵騷擾

爲及時務農以安民生事照得東作方殷正民間播種之時但恐附近地方小民近罹戎馬之擾攘或因運餉之勞煩疲於應命耕力不前三春一失九秋何望擬合行諭爲此牌仰該道官吏卽便轉行進兵附近縣分曉諭四境人

民知悉各要趁時耕種及早栽插以冀秋成之望庶免枵腹之虞如從征軍兵敢有擅動居民草木牛驢豬雞等物驚擾者許被害之人徑赴監軍該道或委官處稟告照依軍法輕則細打重則斬首施行毋得姑縱未便

再催南川路進兵

爲軍務事照得南川路領兵宣撫馬千乘頃進神衛壩兵至赤巖遇賊拒道則奮斬首級四十五顆宣撫冉御龍今進清溪河兵至礦子山遇賊伏路則敵斬苗級六十八顆看得二司官兵勇冠三軍所向無敵本部院近日又將平茶邑梅等司官兵調發合哨真虎而翼者矧四司官兵素

稱克和同心戮力今初薄賊境卽著奇捷賊膽頓破滅此
可期相應乘機進取不宜曠日持久爲此票仰該道文到
卽督四司官兵決策奮勇斬關擣巢首獻渠魁盡斬惡黨
該鎮仍親率將兵隨後接應務期計出萬全功收一舉早
奏奇勲共受上賞此本部院之所跂足而望斷不肯少負
血戰之勞者諒之諒之

行總兵陳璘由白泥進兵

爲軍務事近據鎮守偏橋總兵官陳璘呈送該路進兵圖
畫書冊到部內將偏橋龍泉各分一路就中路道之險夷
苗民之順逆撫剿戰守之機宜安營劄寨之地利貼說精

詳明如指掌本部院觀閱之餘不覺虜在目中矣除龍泉路已經分行副總兵陳良珙等進剿外查得該鎮自偏橋起由楓香大塘白泥草坪大小烏江餘慶至湄潭取道抵播州甚得要領可以持循矣乃偶聞該鎮舍白泥攻三渡正道而從思石進龍泉若果如此誤之甚矣蓋緊要者無如白泥一帶此中四牌諸苗作梗必該鎮與李總鎮合兵先剿此苗以清運道然後乃可長驅方爲上策若舍此而他往萬一各道並進賊勢危急糾合諸苗由此乘虛衝出則偏橋不保大事去矣失機之罪誰其任之且龍泉小徑也一陳副總提二萬之眾破一板角尙有餘裕安用彼大

將多兵爲哉該鎮素諳韜鈴何始而如此深謀繼而如此淺見甚孤倚望不勝焦思矧將在外君命有所不受卽本部院奉命總督尙不中制誰敢掣而肘也爲此牌仰該鎮查照原議一心任事毋爲人紿督率三軍仍從白泥進攻會同李總鎮先將四牌諸苗勦殺盡絕然後分路長驅直搗播巢務將渠魁就縛黨與悉擒大展雄武之才早奏蕩平之績論功酬報爵賞具存中間偏裨有不用命糧餉有不接濟者指名揭報本部院應叅究者卽行叅拏應斬首者卽行梟示決不輕貸若該鎮不遵號令進兵以致違誤軍機者責有所歸具遵行過緣由報查

催總兵劉綎進兵

爲軍務事照得該鎮大破三洞與九盤之捷本部院單敘該鎮首功特疏具題矣連據塘報東路則眞州之望草龍泉之板角偏橋之三渡西路則二郎壩之巖門兵俱逼關斬獲多功各有並進之會因計四路一進賊勢必分勢分而婁山之守不撤卽解體矣該鎮將士養銳數日可以整搦乘機取事驅石虎以斬婁山關跨海龍而奪白田壩所謂有效之師無堅不破合行查催爲此牌仰該鎮卽查楊朝棟曾否退去張漢清等見在何處如尙抗拒或揮兵盡殄以便專力長驅或劄營把截以圖撤身徑進兵貴神速

師在相時若得急早破關首先擣固逆賊不足擒全捷可畢奏矣此本部院所以最望於該鎮者非飾詞也諒之

行湖廣催餉究革管糧通判

爲緊急軍務事案照先該本部院查得陳總兵所部兵馬屯營播境眾兵飢餓呼天叫地無可奈何隨經牌行該道一面催運一面查究去後未報今又訪得該鎮官兵進攻白泥搜山之後官兵仍無糧食飢餒不堪總兵差把總韋金太等六十人奔至鎮遠與管糧通判周以敬處請糧木官竟不肯發爲照該路糧餉節經本部院催僂運貯偏鎮聽支不知該道因何不行起發至於通判周以敬旣司餉

務當知人生一日無食必不能生乃三軍告匱請餉竟不
支給致令枵腹號泣有人心者決不若是如此誤事豈容
尸位按法卽應拏究姑先革職示懲爲此牌仰分守湖北
督餉道官吏卽將通判周以敬先行革職聽候叅拏餉務
另委才能官員管理該道查照履行事理前來督同管餉
等官將見在糧餉火速起運營中聽支未到分投催促解
去接濟該道如再不著實經理官兵仍前缺食致誤軍機
本部院惟知有三尺法也慎之慎之具遵行緣由運發過
米數不時馬上飛報以憑查考毋違

再催湖貴進兵

爲軍務事照得本部院總督三省奉敕合兵征剿播賊欽奉上命賜以尙方寶劔如有不用命者先斬後奏欽此遵將八路兵馬定限二月十二日開刀十八日直抵播州如違以賜劔行事去後在明旨森嚴在尙方至重矣乃今師期已近彌月催督不啻五申止據川中各路所報剋洞破寨擒斬亦多招降甚眾而該省各路官兵不但無功可報抑且杳無一言觀望不前坐違原限據法卽當遵旨從事但念用人之際姑再立限少示寬假期收厥功爲此牌仰該道官吏自今爲始督勵兵將定限三月二十日同到白田壩會哨三軍並集八道齊攻入虎穴必得虎子搏龍圖

定斬首頭如仍前畏怯逗遛不行入關者該道以婦人髻
髻一頂女衣一身用鼓樂迎至總兵營內卽將該營中中
軍官綁赴本部院原發令旗下細打一百棍過至三月二
十五日不到海龍圍下者將中軍官綁解轅門按以尙方
行事若至月終卽拏領兵官一例施行決不輕貸蓋曠日
持久師老財費法在必行非本部院所能主者慎之慎之
毋貽後悔

俘獲賞格

爲軍務事據兵巡下川東道呈據南川贊理監紀推官高
折枝具呈議稱征播漢土各兵但生擒一名解驗的實首

賊賞銀二兩從賊一兩婦女每口五錢幼男女每口二錢給賞以示鼓舞具呈到道覆議應從所請備行本官遵照如遇發兵擒出賊眾男婦幼小等功俱要審實將有功軍兵分別於懸賞銀內動支其男婦人口隨便安插等因具詳到部院批允去後看得擒獲男婦賞格據議委屬相應合行一體遵照為此牌仰重慶府官吏查照前項擒獲男婦賞格但有奉發到府即便分別犒賞其俘獲婦女幼男或照往例變價以充賞需此在該府酌行詳報毋得違錯責成袁年王繼先於本地方護餉

爲軍務事照得

赤水

里長官

袁年

王繼先

真誠向化志節可嘉

除給劄付冠帶及頒賜銀牌花紅旌獎外查得軍中轉輸糧餉路從本官所管地方經過相應行委護運庶保無虞爲此牌仰本官協同袁年王繼先李長年將部下夷兵嚴加操練分發長灘等處一帶地方設伏把守凡遇官兵管押糧運經過務要晝夜隄防往來護送如有播賊出劫殘寇截搶者必須盡行擒斬本官旣已學好歸順自當傾心效用上答天朝之厚恩下盡己身之職分通候事完具題授職以永終譽如或裏應外合作奸犯科自取誅夷未便愼之愼之

委黃通判管偏橋糧運行督餉道

爲軍務事照得糧餉爲三軍之命脈卽平常無事之時尙不可缺况征戰乎乃湖廣偏橋一路兵馬已經陳總兵魏監軍遵照師期於前二月十二日入哨開刀矣所賴人人宿飽方克用力乃前者營兵六十遠赴鎮遠關領月糧應支發而不支發今者永兵萬眾經過彼中告領預支應順給而不順給致使隨到隨乏枵腹往來怨聲載道令人寒心但途次旣不准支而營中又不解發不知司餉者欲何爲也除將理餉官通判周以敬牌行革職聽叅外合行催督爲此牌仰該道卽便轉行通判黃陞高再多委能幹官三五員限文到卽刻馳至鎮遠偏橋一帶地方查照原行

速將該路糧餉運夫已到者火速轉運營中聽支未到者
上緊催發軍前接濟今後凡遇總鎮監軍有行支糧者卽
便給發必使運道疏通師得宿飽事完之日論功優敘決
不食言如或怠緩誤事致軍有脫巾之虞如周以敬者自
干罪戾未便

一牌行

魏監軍
陳總兵

爲此除行督餉道及通判黃陞高等嚴行

催償外牌仰該

道鎮

官吏卽便不妨督兵事務多方徑自催

併今後該營糧餉或轉運不繼或支用將盡一面嚴文督
催一面徑行關領務使糧運疏通師獲宿飽凡賊有不滅
責在該鎮糧有不繼責在委官愼之愼之又若委官抗違

不遵致誤軍機者據實揭報以憑拏問罷職決不輕貸

催彭元錦進兵

爲軍務事頃據塘報永順宣慰彭元錦統兵一萬已到偏橋入哨及稱師有紀律兵多精勇等情到部據此則前此所云整搦以待信不誣也及照本官連篇建白足徵滅寇之誠提兵過來尤見勤王之念謀猷並著忠義凜然此土司中之拔萃者也但兵貴神速機在相時不宜曠日持久老師費財合行督勵以收厥功爲此牌仰本官限文到乘其初至銳氣正盛之時聽總鎮訓遣獎率軍兵畫定方略首破三渡關次取海龍岡大展宣效之誠早奏蕩平之績

所謂入虎穴而得虎子擣龍固以斬龍首勿食斯言可也
捷報至日定行照格具奏褒以隆恩決不相負慎勿畏怯
不前未便愼之愼之

獎馬千乘

爲軍務事連據監軍道並監紀官報稱石砭宣撫司統兵
宣撫馬千乘自出師以來奮勇先登屢建奇捷首挫賊鋒
等情轉報到部看得本官壯貌雄姿丹心豹略經百戰之
場身先士卒而所向無前提一旅之師躬入高深而當之
立碎賊鋒屢挫勳績居多此土司中忠義之出類者相應
加獎以風怯懦爲此牌仰該道鎮本官即便轉行宣撫馬千

乘限文到即便整搦兵馬畫定方略或合同諸營或單取一路先克桑木關卽擣海龍固擒元兇殲羣醜大張撻伐之威用奏蕩平之績功成之日本部院破格具題將本官褒以隆恩其妻秦氏特加封誥蓋該司功高諸土司理合薦揚以旌能者決不相負惟一意立功毋負軍門所最望者慎之慎之

獎戒陳璘李應祥二總兵

爲軍務事連據塘報鎮守偏橋總兵官陳璘親統兵馬依期出師二月十五日兵至白泥行未十里遇賊接戰率兵向前奮勇迎敵擒斬賊級三十五名顆俘獲男婦一十八

名口二十七日官兵進次龍溪探箐密林去四牌不遠前
哨報有埋伏督兵趨敵時方雨霽又轉順風火器亂發賊
兵難當登高拒險矢石如雨隊長謝漢月臨陣先退本官
親斬陣前諸兵奮衝各賊披靡通計斬首九十一顆等情
轉報到部爲照湖廣總兵陳璘奮虎威而躬馳陣上四牌
之捷無雙戮鼠竄而立殉軍中一戰之功累百甘苦同於
士卒忠赤出於性成且無秦越相視之情更多同舟共濟
之義眞武將中之英傑無能出其右者合行加獎以風怯
懦爲此牌仰本官限文到即便決策定謀再將七牌殘寇
盡行誅剿以清運道然後提兵並進破三渡關擣海龍囤

擒渠魁殲羣醜大展智勇之才早奏蕩平之績捷音至日本部院定行破格具題隆以爵賞的不相負軍中一應機宜悉聽便宜從事決不中制惟該鎮一力竭忠靖難除暴安民是所最望者諒之諒之

爲軍務事連據塘報鎮守偏橋總兵官陳璘親統兵馬依期出師二月十五日兵至白泥行未十里遇賊接戰率兵向前奮勇迎敵擒斬賊級三十五名顆俘獲男婦一十八名口二十七日官兵進次龍溪深箐密林去四牌不遠前哨報有埋伏督兵趨敵時方雨霽又轉順風火器亂發賊兵難當登高拒險矢石如雨隊長謝漢月臨陣先退本官

親斬陣前諸兵奮衝各賊披靡通計斬首九十一顆等情
轉報到部爲照湖廣總兵陳璘奮虎威而躬馳陣上四牌
之捷無雙戮鼠竄而立殉軍中一戰之功累百甘苦同於
士卒忠赤出於性成且無秦越相視之情更多同舟共濟
之義真武將中之英傑無能出其右者及照貴州總兵李
應祥身爲大將責任匪細白泥乃信地也應並進而不並
進期約已違四牌係勁敵也當夾攻而不夾攻策應何謂
一籌莫展寸步不前律以畏縮之條卽應叅究重處合再
姑記嚴加切責爲此牌仰本官限文到卽刻統率部下兵
馬直搏海龍岡擒渠魁殲羣醜大紓神人之憤以雪軍民

之冤有功之日定加優敘如或仍前畏怯不前觀望不進致誤軍機者定行重加叅究決不輕貸慎之慎之

催龍泉進兵行思石道

爲軍務事照得龍泉一路將多員兵二萬可謂精而且盛誠能併力奮勇直奪板關苦竹何異探囊取物乃率師已進龍泉去二關不遠風聞播賊有老虎兵三百欲來衝營遂卽藉口主將有令撤回黃楊壘高壘避住夫以三百之賊不能接戰萬一有盛於此者則當縮頸而奔矣怯懦至此殊可痛恨誤國殃民債事不小據法卽當重處姑再行催爲此牌仰該道限文到移文參將陳良北督率漢土官

兵相機拔營前進直抵關前或用計襲取或奮勇夾攻既破之後卽劄營關上會同各路之兵共搗龍囤擒斬渠魁如或仍前畏怯不前過期不克者定以軍法從事慎之慎之

催綦永進兵

爲軍務事照得南川路官兵已過望草去桑木關止二十里進關卽抵播壩矣所望各路並進以分其勢共成埽穴之功乃該路自九盤子一戰穿巖寨一克之後至今寸步不進止令南川一路以孤軍當賊恐將來不能逃逗遛之罪合就督催爲此牌仰該道官吏卽便統率三軍長驅直

進搗白田壩取海龍固盡擒惡黨悉拔根株斯爲勝算如
仍前逗遛不進致誤軍機者不但取巾幘之辱而已慎之
慎之

再催各路進兵

爲軍務事本月十二日卯時據南川總兵監軍等官報稱
初八日克破桑木關等因到部院看得該路官兵效死克
敵首破險關功居第一除行旌獎懸賞外爲照逆賊所恃
者關也今我官兵一鼓而首破其一賊膽喪矣其餘諸關
自是解體且官兵卽據其關虎視播州腹心之地此土崩
瓦解之勢當不戰自焚爲此票仰

該鎮

文到卽日督率官

兵進烏江三渡巖門板角婁山黃灘等關奪白田壩擣固擒惡俾賊首尾莫救在茲一舉毋得仍前疑畏退縮不前及不能克取者決照聖旨從事不恕

行拏劉效節楊惟中

爲軍務事據湖廣右監軍道呈准總兵陳璘移稱云云等因到部看得逆賊所恃爲敵者白泥與四牌之生苗也人多兇悍擒勦爲難是以責成兩省合攻者誠重之也本部院原定師期以二月十二日開刀乃總兵李應祥高坐會城不行依期進兵已干法紀幸今日報有一捷姑勿論已若參將劉效節者旣承調遣分有信地胡爲始見敵衆則

藏繼見敵危方出應夾攻而不夾攻應策應而不策應若非陳總兵身先士卒親冒矢石決策制勝則損威不小矣緣該省將官率多怯懦不前失事重大情不知畏者蓋因龍泉守備楊惟中避賊失地覆軍損官已經拏問止因一時缺人代管遂令戴罪殺賊立功贖罪惟中未盡本法以致效節旋復倣尤及查惟中近日雖報有功多係投降零星原非斬關擣巢卽有亦難准贖所據二官一則失地覆軍一則臨陣退縮俱干軍令法當拏究爲此除差官齊捧令旗前來外牌仰監軍道官吏限文到卽拏參將劉效節守備楊惟中各到道添差職官牢固管押解赴軍門以憑

按法施行其一官所管兵馬事務卽呈撫院選委謀勇將官二員火速交代接管具由報知不必呈詳此係失誤軍機重情毋得徇私寬縱未便

再禁殺降

爲軍務事照得王者之師惟在除暴安民不欲窮兵黷武祇緣應龍父子叛逆不道自取誅夷節奉明旨所誅者罪止渠父子二人脅從罔治今大兵並進斬關破寨已衝腹心然出於勢屈素知畏法者孰不落膽喪魂羅拜乞降者自是接踵而至如近日落紅安羅等村投降夷民羅國鳴等真川燕子巖等處一帶投降夷民約計萬餘已經安插

得所卽同內地良民訪得有等領兵將領及土司官目明知零星賊級必係殺降希圖冒賞乃竟不行嚴禁佯爲不知甚或通同故縱匿不發覺傷天理滅良心莫此爲甚及查律例擅殺降人并被擄逃回人口冒作賊功者俱以故殺論本管將官失於鈐束降級調衛甚者罷職充軍載在令典昭如日星夫何若罔聞知情不爲異貓鼠朋奸深可痛恨合行嚴戒爲此牌仰該道官吏卽便轉行領兵將領土司目把一體遵照叮囑告戒各該所部漢土軍兵務須謹遵節頒禁令自今以後如遇播夷已投降者卽同良民聽其隨處安插如臨陣乞降者卽送道鎮或監紀等官處

審實安置不許恣行搶掠恐嚇索詐或土官目把占恠子女斷割恩愛如有妄殺一人者查訪得出或被人告發犯法軍兵卽行梟斬本管將領土官目把以故縱論罪決不輕恕各具遵依緣由報查仍移文總兵官知會毋違

獎賞破桑木關官兵

爲獎賞首破險關官兵以鼓敵愾事據川東監軍道報據南川眞州監紀推官高折枝報該總兵馬孔英塘報初八日夜據前哨官兵報到各土司兵及毛兵剋破桑木關官兵據關劄守等因到部院看得逆賊所恃者關也乃我漢土官兵夜造其關奮不顧身一鼓而破之大振我軍之威

立破逆賊之膽功居第一勇敢無雙且今已立赤幟於關
前徐當就烹遊魚於釜底矣所據將官之決勝萬全及軍
士之鼓舞用命均有可嘉查得賞格內開一漢土官兵有
能奮勇先登入關者陞三級賞銀一千兩除陞級聽候并
敘外合先獎賞以鼓勇進爲此牌仰該道官吏卽於懸賞
銀內動支銀一千兩解去營中聽推官高折枝會同總兵
馬孔英將首挫賊鋒奮勇先登入關官兵酌量人之勇怯
兵之多寡分別等第登時給賞其有死傷者仍加厚爲優
恤以示本部院旌異首剋險關懸賞之意具支賞過緣由

報查

再催綦路進兵

爲軍務事據綦江路監紀官同知史朝貞報據鄉導報稱
十二日哨探至笋子壩見彼處播民自播州同取飯米稱
說楊應龍傳令初八日點苗出關親領一枝由新開徑路
小水九里出白節巷來九盤子敵戰分一枝往望草真州
絕南川餉道據報情形亦有近似果然則賊出巢空可乘
似當急發一令促永合二路乘虛併進使賊顧巢不然九
盤子各營尙可以逸待勞南川之餉不亦危乎等因到部
看得賊若出關分兵敵戰必不傳令令人知之今使取米
者皆知之此虛聲也縱使果來亦必顧家兵力能分則領

出者亦必不多自當直前進而破之無有不克乃信其虛聲高坐九盤子爲以逸待勞之計反欲他路乘機進兵何其怯也若使兵尙在綦江城便可坐綦江待之乎應合哨不合哨軍令具在將欲嘗試尙方乎合行亟催爲此牌仰該鎮卽便催督三軍刻期前進席捲關隘不必過忌致滋疑畏如再逗遛不前中軍將領等官定照軍令以尙方從事決不爽信慎之慎之

以地畝稅糧派軍餉

爲夷氛甚惡天討宜彰懇乞亟發餉銀以佐軍興等事萬曆二十七年十一月內准戶部咨該本部院會題云云等

因奉聖旨是軍興餉急這四川湖廣地畝加派在權宜行
著總督於三省通融支用仍禁有司豪右巧避貪漁等弊
毋致累害窮民兵罷之日卽行具奏減免欽此移咨前來
隨該本部院看得蜀民自採辦以來連歲兵荒民不堪命
意者播事早完具題蠲免不欲加賦於民遂爾案候未發
乃今征勦之師雖已進攻而凱旋之期實難逆覩今餉費
無窮財用有限若不預爲會計萬一臨渴掘井其何能濟
所謂部議前項加派地畝賦稅合行起徵爲此案仰布政
司官吏卽便查照題奉欽依內事理限文到日通行所屬
府州縣掌印官出給告示諭令小民遵照明旨於正賦之

外照依原額每糧一石徵銀一錢二分共足一十二萬三千四百二十五兩定限四月終旬盡完起解在川東川北三道解重慶府在川南川西三道解瀘州各貯庫聽支接濟軍餉各有司仍編簡明由單給與花戶俾知照數辦納如經管官吏并解戶豪右人等巧避貪漁以致累害窮民者或訪出或告發定將正官嚴加叅究吏書解戶從重問遣決不輕貸通候事甯停止倘凱旋在即前銀未支卽作下年應納正數仍題請蠲免以示蘇息此係專以地畝稅糧起科毋得派及人丁混徵擾民未便仍移文分守督餉各道一體督催施行

以丁糧派夫價

爲患切剝膚敬陳一得以圖萬全事萬曆二十七年九月
內准戶部咨該工部左侍郎趙題議四事內一款亟加寬
恤以固人心大軍一興征調轉輸勢必不能罷其力役但
須就中調停加意撫字如運糧一節約計一縣該運若干
石腳價若干兩卽於通縣丁糧不論應否優免派銀若干
交納有司雇夫委官督運等因覆奉聖旨銀兩准給發軍
興爲急編派著照丁糧出辦毋以優免靠損小民欽此移
咨前來先是本部院行據督餉道議得川省從征官兵大
約一十八萬該運夫一十二萬酌以丁糧一例編派貧者

出夫運餉富者出銀幫貼聽其自相募應以便眾輕易舉
允行間適接待郎趙前疏看係行令徵銀雇夫彼時欲行
徵派慮恐納解不前隨計算運夫一十二萬師期三月每
名日給工食銀三分行則全給坐則半給每月二十日爲
行十日作坐計每月該銀七錢五分三箇月該銀二兩二
錢五分十二萬人共該銀二十七萬五千兩上東下南二
道去播稍近則就近派夫轉運免徵腳價上南下東西北
四道距播寫遠則徵銀解作募價免行派夫一面借支軍
餉募運一面聽候起徵填補今查軍前餉需支放將盡所
有前項夫價原係題奉明旨應徵之數應合查議起徵爲

此除會按院將上東下南二道編夫之苦難以派及外案
仰布政司官吏卽查運夫一十二萬該工食銀二十七萬
五千兩要見上南下東西北四道所屬州縣共該額糧若
千人丁若干每糧一石該派銀若干每人丁二丁准糧一
石該派銀若干通共該銀若干務足原借過軍餉二十七
萬五千兩之數會計明白一面先行各該府州縣掌印官
出給告示諭令小民遵照明旨於正賦之外照依本等項
下丁糧如數辦納定限四月末旬盡完起解一面具由通
詳不必允後方行致滋往返耽誤在下川東川北二道解
重慶在上川南川西二道解瀘州各收貯補庫聽支接濟

軍餉各有司仍照舊規編置簡明由單給與花戶俾知照
數辦納如經該官吏并解戶蹈襲舊弊恣意重秤多加火
耗指勒刁難靠損小民者或訪出或告發定將正官嚴加
叅究吏書從重問遣決不輕貸此係不論優免專以丁糧
起科毋得影射混徵擾民未便仍移文分守督餉各道一
體督催施行

催總兵劉綎進兵

爲軍務事照得綦江路近日又添甘陝鎮雄各處兵馬近
萬則兵力不爲不重矣乃亦按兵不動大都以穆炤來降
爲進止似矣但此賊或言來降或言爲質又或必待大兵

入關方投卽此遷延不決親身未至明示詭計偷生或俟
酋兵併力出戰決非真心聽撫若就輕爲聽信恐至墮其
奸謀是以我之有制而反不能克彼之無制矣爲此稟仰
該鎮限文到卽差的當人役再去偵探此賊情形如其真
降令其卽日來投免沮帷幄之先謀銷士卒之銳氣設或
仍前延調則分別順逆率師前進相機盡剿蓋以眾加寡
以順討逆何必拘拘以此輩爲輕重而牽制也軍令具在
他檄茲不重喙慎之慎之

催各路進兵

爲軍務事據貴州左監軍道報稱童總兵督水西兵擬十

一日打烏江關推以江漲改十三日進有永順兵以奉令在先遂不肯待同壩陽兵一枝渡河曾不移時萬軍畢渡焚燒險關十里煙蔽前哨已出刀靶水泥溝石坎之險盡已綦布屯劄士氣騰躍勢已破竹等因到部看得永順壩陽之兵不滿二萬而飛越遄急之水克破至險之關何其壯也快哉快哉若

永甯偏橋平越綦江龍泉

以重兵四萬反不能破一

巖門

關令人聞之當愧死萬萬矣合行督勵爲此牌仰該

道

限文到卽日移催

劉陳總兵曹副將吳李

懋參將率兵進關火速徑

擣賊固蓋烏江一破距播地僅八十里今此路官兵齊衝腹心逆賊父子魂魄皆喪安能出兵迎敵只管向前勿再

疑畏縮頸也速速

再催各路進兵

爲軍務事照得

沙溪龍泉

路之

朱鶴齡陳元龍

頓兵不進該本部院立

限三月二十日進白田壩至期不行入關者該道以巾轎

冠服迎至

本該館

之營將

本該館

中軍官細打一百棍過至二

十五日不到海龍國者中軍官綁解轅門斬首徇眾若至

月終卽拏領兵官一例施行蓋法在必行軍中無戲言者

是也今計限期已屆誠恐至期畏縮如故該道徇情不行

是廢法也合就嚴督爲此牌仰該道官吏卽催

朱鶴齡陳元龍務

遵軍令的擬二十日破關到白田壩至期不進者卽將巾

幘冠服迎送本官收受就將本官中軍官細打一百棍過至二十五日不到海龍國者卽將中軍官綁解轅門以尙方行事如該道徇情不行者叅究不貸

再催永甯進兵

爲軍務事照得副總兵曹希彬原任永甯閱歷旣久中間土夷之情性人心之向背無不周知故本部院不以本官見奉叅提特委專督該司土兵蓋知本官與該司官目恩信相孚上下相應必然言聽計從事無不濟者乃今進兵一月以上該司別無創立之功且聞執拗不聽調遣逗遛不肯向前似此驕悍養之何益本官職在監臨因何坐視

不加策勵委用謂何合行督責爲此牌仰監軍道官吏轉行曹希彬卽便遵照原行專督永甯一司士兵取路直進凡該司一切事務進止機宜悉聽本官督同官目協心計議上緊進剿早奏奇功以慰勛望如再仍前藉口含糊推奸誤事致失機會者本官不但無復功名之望且行有尙方之及矣慎之慎之具遵行緣由報查毋遲

行龍泉路官兵相機戰守

爲軍務事據龍泉路監紀知縣鄧宏烈報稱本月十五日統施南散毛忠峒等兵與賊大戰克破板角關擒斬多功乞賜發兵接應又據參將王一桂呈報相同等因到部院

爲照十一日據報永順司官兵恐違軍令不待他助單約
壩陽之兵飛越烏江立破此隘本部院方行獎賞去後乃
今該路又報施南三司與賊力戰旋又斬關是四司皆有
滅此朝食之志自非忠義所激真心任事曷以至此除另
行獎賞外及照破關旣難守關亦難目今烏江一路兵馬
三枝已衝腹心而婁山巖門三渡黃灘諸關每日攻打不
日當克此時逆賊膽落魂消自顧不暇安能提兵遠出但
困獸思鬪不可不防合行隄備爲此牌仰該道官吏即便
移行副總兵陳良珙督率在營大小兵將逐一分布某兵
移文陳副總王參將據關屯劄某兵在關前某兵在關後又某在歧路之左某

在歧路之右分定信地立營困守賊如不來不可妄動設
或來衝相機戰守或前後策應或左右夾攻悉聽便宜行
事如應策應而不策應及應夾攻而不夾攻與夫深入窮
追致墮誘計者責有所歸少俟哨探我兵諸路並進然後
驅兵直搗共埽巢穴擒斬渠魁早奏捷音共受上賞仍諭
宜撫覃宜等務要用心任事始終如一功成之日斷加優
厚決不相負俱毋違誤未便

申飭龍泉招降報功奸弊

爲軍務事照得龍泉一路官兵自二月十二日出師以來
頓兵不動以致各軍無所事事日以劫掠殃民慘更過於

播寇又訪得招撫夷民有先係此營撫出至中途爲彼營
强者所奪要去報功者有趙甲招出人口無兵接引爲錢
乙官兵撞遇遂指爲奸細或擒或斬以爲功者人自爲心
惟功是嗜且把總所獲之功不鳴之於參守參守所報之
功不聞之於主將皆係徑報以致零星不禁人人俱能殺
人而不必稟奉將令其於體統蓋甚謬矣合行申飭爲此
牌仰思石道官吏卽便移文副總兵陳良珖并監紀推官
吳天祐各遵照嚴禁各營軍士俱要遵守紀律不許仍前
專肆劫掠擾害居民其招撫夷民聽其各自具文引見如
有恃強搶奪及殺降報功者或告發或訪出卽擬抵償此

在監紀官留心詰問摘發不許輕縱至主將無功以各裨將之功爲功裨將無功以各把總之功爲功如奉將令攻打一處堵截某處或臨陣或伏路所獲功次宜盡報之主將主將卽據其所報者轉報俱毋違錯未便

蔡江路糧餉不繼行拏參將麻鎮

爲軍務事節據蔡江路將官報稱進兵在卽糧餉不繼隨訪係護餉參將麻鎮退怯不前以致三軍枵腹不能應敵及查本官前有文稱必欲得軍六千方敢護餉及查各路並未有以六千護餉者今本官已擁兵三千去城百里尙不敢進前途豈不誤事合行拏問爲此牌仰巡上東道官

吏卽添差人員同差去官將麻鎮綁拏解赴轅門以憑處
治速行都司程試前去護運其綦江城行都司哈光顯前
來防守俱毋違錯未便

諭催永甯進兵

爲軍務事照得永甯一路調到撫司土兵數至三萬不爲
不多木折各已支給不爲不厚乃今開刀一月之上未豎
尺寸之功明係觀望逗遛有違軍令且該土司與別司不
同爾家孤兒寡婦別土司不時欺害本部院常與爾作主
使爾官民俱得相安無事自宜盡忠竭節圖報萬一奈何
爲別司誘引相率觀望是自求禍也卽應行法合再催督

爲此合行牌仰該司土官吏即便獎率目把土兵各奮忠
勇破關殺賊功成之日本部院據實上聞定將本官封爲
忠節夫人各目把分土加爵各有酬賞決不相負如再延
遲不進定行盡法處治決不姑息各宜深思毋貽後悔

催永甯兵

爲軍務事照得征勦播賊已經通行三省於十二日開刀
進勦又經通行永甯水西二土司各土官親自領兵催督
去後止據貴州宣慰司報稱宣慰安疆臣領兵駐則窩其
母鳳氏領兵在雨剌止候至期進勦今照原限十二日今
已十三日永甯宣撫土官奢世續並未報有出邊日期駐

劄地方胡命森嚴軍令顯赫輒爾高臥私家寸步不移豈欲存留播酋以盡狐兔之情耶抑是坐觀成敗徐看鵲蚌之勢耶有干軍法合行切責爲此牌仰該司土官奢世續文到卽便起身赴邊督兵進剿先將起程日期所至地方馳報如再遷延觀望本官心事可知義旗反指悔之晚矣

詰責安疆臣

爲軍務事頃報河渡失事本部院以爲勝敗乃兵家常事何足爲訝且謂烏江已據險要又有水西兵劄左右萬無一失乃今播賊親統苗兵兩出旣衝河渡再衝烏江而該司旣不發兵救應又不乘虛搏集惟伴爲不知坐觀成敗

且軍前一云水西兵馬會話一云水西兵馬在內不知是何主意此本部院真不可曉者合行查催爲此牌仰該司官吏卽查播賊兩次出兵河渡烏江該司因何不行救應坐觀成敗又因何不行乘虛直搗縱賊歸巢與夫曾否有無兵馬在內會話等情詞出一口是何緣故卽今應否進兵乘機取事以明心迹逐一明白回報以釋此疑毋得含糊支吾未便

行重慶府發銀賞龍泉功

爲飛報血戰大捷等事據委官雙流知縣鄧宏烈呈稱施兵八千自三月十三四五等日攻破險壘險關連日戰陣

殺賊無數至十八日申酉戌三時據三土司飛報本日寅
卯時播酋統馬步四萬名爲老虎兵二路包圍關隘我師
參將王一桂指揮唐一麒督施南等司宣撫等官分兵迎
敵從寅至未血戰百合我兵雖少殺賊萬餘屍橫遍野血
流成河未暇斬級同路將官遠隔四十餘里絕無一卒應
援等情連報到職爲照施兵戰氣百倍以一當百奮勇驍
雄王唐二官親冒矢石屢戰屢勝賊眾喪膽官兵效力例
應獎賞等因到部近據各司報稱官兵於十五日克破板
角關斬獲多功方擬行賞間今據前因看得施南散毛忠
峒三司官兵八千員名奉調前來協同湖貴二省官兵由

龍泉路分道進剿出師已逾一月率皆逗遛不前獨施南官兵方報已破險關復大戰得勝忠勇過人實爲奇捷相應獎賞以鼓勇進爲此牌仰該府官吏卽於庫貯懸賞銀內動支五百兩差委能幹官員管押前赴兵巡思石道告投轉發知縣鄧宏烈聽本官公同參將王一桂分散施南三司有功官兵收領以示本部院優待剋關大戰懸賞之意具支發銀數報查毋違

催綦永二路進兵

爲軍務事照得貴州近克烏江關將以爲喜乃連日以來被賊詐敗誘敵復假水西兵馬換旗不作整備變起倉卒

遂致衝破此勝敗係兵家之常事不足爲訝但本部院曾
有密諭凡入關之後俱要剗定待各路兵齊方進如南川
之桑木龍泉之板角克破已久堅壁以守按兵以待何等
萬全今烏江輕率寡謀墮其香餌固其自取若使綦江永
甯二路及早入關以分其勢則烏江不致取敗且長驅直
擣矣奈何二路頓兵不移以致賊窺動靜抽身撤兵併力
以向以致此路有失實係二路之過殊可痛恨爲此牌仰
該道卽今大兵旣已逼關自當克進據險以守或直擣長
本官驅或相機而動一以解烏江之危一以殲逆賊之黨因何
一向凭几而望更要等到何時如不能克明白一言以釋

此疑毋使本部院晝夜焦思也速速

催湖北道運糧

爲軍務事據分守湖北督餉道稟稱楚師應進龍泉而陳
總兵由白泥進烏江遂有兩路饋糧在烏江者往返八日
在龍泉者往返十日米在鎮遠偏橋不能盡發見在人夫
四千五百人分作二路糧多夫少路遠人難不能翼而飛
者以此獲罪運也命也惟是天理人心豈容泯滅等因到
部院據此爲照陳總兵由白泥不進龍泉原係本部院分
布蓋白泥接壤四牌悍苗若越此他往此輩衝出偏橋爲
害不小故進白泥先埽此寇非爲黔實爲楚也埽白泥而

渡江自與龍泉路合矣兵有深機自難別議及照運夫每名可運米三斗四千五百人往返十日止運米一千三百五十石而已兵一名每名每日應支米一升四萬兵十日該支米四千石此卽往來不歇已僅足三分之一况加以陰雨耽延夫有不行之時兵無不食之理其爲不足屈指可知此與分兵何干乎縱使陳總兵進龍泉糧可得足乎夫兵行糧從兵分則糧分兵合則糧合若兵多而糧少則宜增糧若糧多而夫少則宜增夫今該道不議增夫而病分兵不侔甚矣川中一兵一夫更番迭運尙若不繼楚卽近播一二萬夫亦不可少乃今運夫之少一至於此何怪

乎兵採蕨以充飢將呼天而無從也迄今近地尙爾如此此去入播道途長遠將焉賴之軍兵枵腹此安危之機不可不計業已誤事卽歸咎於命有何益乎且數萬軍之命豈可輕易擬合再行爲此牌仰該道官吏卽便查照節行事理速將該路四萬有奇官兵糧餉不妨會同辰沅兵備及監軍二道同心協力督率通判黃陞高上緊催督饋運營中聽支以救脫巾之虞其人夫必計道里之遠近往返之遲速或以一名管二兵或管三兵不及之數或派之就近州縣之甲夫或取之就近州縣之民壯及就近衛所之軍餘又或抽取城守之軍兵俱無不可惟求取足共濟時

艱不必拘泥致誤大事糧運流通師獲宿飽逆賊早滅共結此事方得息肩若糧不通賊不滅本部院與當事各官皆不知所終者慎之慎之火速火速

給施州衛指揮唐一麒加銜劄付

爲軍務事照得領兵征播湖廣施州衛指揮僉事唐一麒於本月十五日獨領施兵打破板角關又孤軍守關賊來敗走之連日大戰一十五陣斬獲賊級四百餘功具報前來令人大快爲照本官英姿邁眾壯志超羣兼人勇猛冒矢石而立破險關料敵精明越山嶺而盡殲羣醜此在諸領兵官中功爲第一者合先加以職銜以示旌異爲此劄

仰本官即便遵照以守備職銜任事待成功之日特爲題請實授并諸土官一體破格陞賞此後要須鼓勇殺賊長驅直搗擒斬逆賊父子更有非常恩典斷不相負

責水西進兵

爲軍務事照得宣慰安疆臣提兵伐播一克三關土官龐澄追兵剿播深至大水田聞者莫不稱奇賊膽因之已落滿擬破竹之勢已成犁庭之功可必矣不虞河渡烏江之師偶有少挫此勝負乃兵家常事固不足爲輕重但據塘報有謂該司差人換旗者有謂水西獍兵在內者本部院不能無疑近據該省撫道稱係逆賊詭計始爲釋然蓋疆

臣母子夙有許國之忠而陳恩叩見轅門亦有報效之志豈有自食其言而速欺天不韙之罪或者逆賊反間他人忌妒耳第該司兵與烏江兵相去不遠彼路失事該路全不見救援且賊兵經過新站土官隴澄亦未見阻截終招妒功之嫌難免私通之議合行督勵爲此牌仰本官卽查逆賊旣衝河烏二關過新站營前該府司因何不行發兵救應阻截是何目把失誤有無情弊卽今巢穴作何進取逆賊作何成擒必須早奏膚功以免曠日老師大都此賊不滅恐該府司心事終不能明也慎之慎之

行獎安疆臣兄弟

爲捷報事本年三月三十日據貴州宣慰司宣慰安疆臣
報稱本月十三日統率目兵攻破黑水關大紅關又於十
六日同鎮雄府土官隴澄攻破洛蒙關大水田官兵距播
州僅十里乘勝擣巢逆酋當旦暮授首矣等因到部院看
得二官持重有謀量敵善戰深入賊地冒矢石而連克多
關直透虎巢越山溪而盡殲羣醜伊母鳳氏性稟貞淑躬
履戰場有繼夫之大志有勤王之真誠賢母賢子難兄難
弟誠可嘉尙雖近日烏江河渡之失不免有坐視不救之
譏而提兵徑擣大水田若履無人之境此人所難者相應
旌獎以鼓勇進爲此牌仰該道卽便轉行宣慰安疆臣土

官隴澄并伊母鳳氏各遵照承獎之後益勵忠猷嚴督軍兵擒賊父子以樹崇勳照格題請以膺陞賞流芳百世實惟此時不可失也慎之慎之

行守下南道督夫

爲軍務事照得合江路前後編派運夫三萬永甯路四萬計數似已足用乃夫旣倍加糧尤不繼師未飽宿頻頻督催在在告匱其故爲何蓋因官兵進營漸遠路險轉運艱難加之管押員役不行護送以致人夫任意遷延大率坐此查得綦江路近因轉輸不繼復於原議二萬之外再加一倍始獲流通所據一路運夫亦應一例議增庶克濟事

除行巡下南敘馬瀘二道各於原議州縣酌量派增外爲
照三路官兵始則會集幹壩地方今則徑進崖門直擣海
龍固所需糧餉不啻然眉雖有兵巡二道分任其事然兵
多路遠一人一手拮据難周及照下南一道總屬分守轄
屬則二路戎務皆其職掌催夫督運均有責任今官兵並
進惟二郎壩缺人料理相應專委催儼共圖滅賊爲此牌
仰該道官吏即便親詣二郎壩嚴督管餉管運等官催儼
糧餉等項一日一次督夫運入營中接濟以免三軍枵腹
如有州縣等官仍前怠忽卽據實揭報以憑重處佐領委
官就便行提戒飭該道將每日起運過米數馬上飛報不

許有誤未便

催湖省道鎮會兵擣巢

爲軍務事照得川省官兵南川路以前月二十六日入關
婁山路以前月三十日入關永合路以本月初一日入關
卽今日日與賊大戰擒斬甚多賊已窮急滅亡不遠乃各
路尙多觀望不進以三省八路之眾令川兵獨當其鋒刻
期久違法紀何在除另行外合再嚴催爲此牌仰該鎮道文
到督勵官兵卽刻星馳前進會合白田壩擣海龍囤共擒
逆賊綁獻闕廷大彰國典此係川兵立等會合萬分緊急
事理如再觀望延遲定拏各鎮中軍官遵奉敕劔行事決

不食言

行監軍道獎賞破關

爲獎賞克破險關官兵以鼓敵愾事照得婁山關爲北路

之險逆賊之所憑恃者乃據劉總兵率同將領等官併力

克破大振我軍之威頓寒逆賊之膽赤幟大豎於關內遊

鯢就烹於釜底矣良由將官之決勝萬全軍士之鼓勇用

命查得賞格內開漢土官兵有能奮勇先登入婁山關者

陞三級賞銀一千兩除陞級聽候并敘外合先獎賞爲此

牌仰該道官吏卽於懸賞銀內動支一千兩解去營中聽

同知史朝貞會同劉總兵將首挫賊鋒奮勇先登入關官

知府蔡宗憲

吳

兵酌量人之勇怯兵之多寡分別等第從公給賞以勵三軍其有死傷者仍厚加優恤以示本部院旌異剋險之意具支賞過緣由報查

申飭軍中匿婦人

爲軍務事照得本部院原頒軍令內開一劄營內地焚人房舍淫人妻女搶人財物者斬一俘獲賊屬子女及被擄男婦隱匿入已不卽報官者細打一百等因通行頒示嚴且切矣今訪各營奉行頗謹惟該路軍兵不以殺賊爲事往往利其所有他不暇及卽擄掠妻女一事填滿營房縱其姦占肆無忌憚耗已之銳氣增賊之憤敵深可痛恨且

狡酋詭計多端專一安排婦女或聚之於空寨之內任其
行姦或散之於大道之間餌其收取一墮其計卽被挫衄
如近日烏江河渡是也本管將官知而故縱法當通行拏
究按法行事姑再申飭爲此牌仰該道官吏卽便移文總
兵轉行將領等官各將本營軍兵姦占妻女逐一查出審
問姓氏備造一冊解赴重慶府點驗變價充犒如有隱匿
不發本部院密訪得出定行指名擒拏梟示仍將本管將
官一體重究決不輕饒今後從征務要奮勇殺賊毋得仍
前再行擄掠致墮賊計干犯軍令未便

平播全書卷十終